




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

APERILA 2016

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O le Faato'aga o le Loto: O Iesu ma le Alafau Taumatau, Ofu Tele ma le Maila e Tasi

Saunia e:

Olive Samuelu FS

Faia'oga o le Mataupu Silisili
Kolisi Faafaiifeau - Malua

Faatomuaga: Ua iloga le tula'i mai o le tele o faafitauli ma faalavelave e tutupu i soo se vaipanoa o le tatou soifuaga, ona o le loto taumasui o faaauau itulau e 2

Mafuaaga o le Pese:

All Creatures of Our God and King

Sal. - 145:10,11: Le Alii e, e vivii atu ia te oe mea uma na e faia; e faafetai au foi ia te oe ou tagata amio Atua. E tautalatala atu i latou i le mamalu o lou malo,, ma ta'uta'u atu i lou mana.

silasila itulau e 10

Le Lalolagi e!

(silasila itulau e 7)

O le Pine o le Alofa Faavavau

(silasila Itulau Mo Tupulaga
Talavou - itulau 11)



Iesu ma le Fafine Samaria i le Vai'eli

O le inu i lenei vai e toe fia inu ia. A o se inu i le vai ou te avatu ia te ia, e le toe fia inu lava ia; a o le vai ou te avatu ia te ia, e avea i totonu ia te ia o le vaipuna, e puna i luga i le ola faavavau. (Ioane 4:7-30)

Taumafa Maloloina ma le Tusi Paia

(Healthy Eating and the Bible)

silasila itulau e 4

O le Faato'aga o le Loto: O Iesu ma le Alafau Taumatau, Ofu Tele ma le Maila e Tasi

mai le itulau muamua tagata. E letioa foi le Alii o Iesu, ona ia fetalai tuusa'o, i le ogaoga o faafitauli e tutupu, i ona foi vai taimi, e faatatau lava i le le puleaina lelei o le loto o le tagata, e tupuga a'e ai mea lelei, ina ia le gata ina ia manuia ma ola saogalemu ai le tagata, ae faapea foi i ona uso-a-tua'oi. O le agaga ina ia toe fetuutuuna'i le tofa ma le uta, se'i taga'i ane ma taga'i ifo, i e o mafatia ma taotaomia, ona o se tu ma se aga ua faia.

O le agaga tonu lea ua manatu ai, e toe aumai se manatu sa faatauaina ia tatou faiga lotu e le'i mamao tele atu, 'O le Faato'aga o le Loto', e fai ma autu o lenei pepa. O se mataupu silisili e talafeauga lelei ma a'oa'oga a le Alii o Iesu, e pei ona faamauina e Mataio (5:39-41) faapea foi Luka (6:29). Mo lenei lava taumafaiga, o le a faaaogaina pea le molimau a Mataio, faatasi ma nisi o faatusatusaga talafeagai i le va o molimau nei e lua, i mea e saga malamalama atili ai le autu.

Ua filifilia lava lenei mataupu ma le agaga maua i le aoga ia tatou fetufaa'iga faale-agaga, e le gata ina ia tomatauina ai, ae ia saga faamaupu'epu'e atili ai pea, le

fe'au o le Tala Lelei. E le gata foi i lea, ae ua na o se taumafaiga vaivai e toe faamanatu pea nisi o vaega taua o saunoaga a le Alii o Iesu, ma saga faalauteleina ai pea le tamao'aiga o mafaufauga faale-mataupu silisili.

O Iesu ma le Alafau Taumatau, Ofu Tino, ma le Maila e Tasi

I le faatomuaga o saunoaga a Iesu i le vaega lenei o le tusi a Mataio, o loo manino ai le tulaga pagatia o iai nisi o tagata o le sosaiete. O le tulaga saisaitia ma taotaomia ona o faiga le amiotonu a nisi. O le atugaluga o le Faaola, ona o lea e ta'oto pea alafua o le 'tauimasui'(2) e tusa ma le faasinoga faa-Teuteronome, o se mea e ono afea e le mafaufau, pe a oo ina luluti tiga o le ola taotaomia.

Peita'i, o le fesili tele o loo tula'i mai pea, i le matau a le toatele, afai o lea e finau le Alii, ina ia tuu itiitia le ola pule'esea, e faapefea ona toe saunoa, ina ia toe liliu le isi alafau, ma ave le ofu tele, ma toe faaopoopo le isi maila e tasi? E le o le faaopoopo ea lea o le isi avega, i luga o mafatiaga, e le taumate, o loo feagai nei ma nisi o loo faalogologo i lea aso? Ae lelei pe a se'i o tatou asia pea, le

mafuaaga tonu ua aumai ai e le Alii ia vaega o le olaga i aso uma, e momoli mai ai se faamanatu mo le au faalogologo.

Po le Alafau Taumatau ae Toe Liliu iai le isi Alafau? "...ai se na te po mai i lou alafau taumatau, ia e liliu atu ia te ia le isi:(3) (Lapide 1986).

Aisea ua ta'ua faapitoa ai le alafau taumatau? O le upu 'po', (strike) e pei ona aumaia ai e Mataio, o le faaaogaina lea o le 'alofilima', (an open-handed slap) e faatino ai se gaoioiga. Peita'i e foliga e malie i le faalogo le saunoaga a le Alii, aua foi, e le faigofie ona faatino le 'po' o le alafau taumatau, ona o mafuaaga nei:

(1) - Afai o le alafau taumatau lea e tulitatao mai e Iesu, o lona uiga, e tatau ona faaoga e le matai (master, husband, Roman, superior, ma isi) lona lima agavale, e 'po' ai, ia pe 'tu'i' (a close-handed fist) ai fo'i le tagata o loo sauaina (slave, wife, Jew, inferior, ma isi) ona fetau lelei lava lea. Peita'i, o le lima agavale i tu ma aga faa-Iutaia, na o galuega lava ua taua o 'galuega le mama' (Daube 1947, 102-152), (Wink 1992, faaauau itulau e 5

(1). Mataio 5:31-41: "...ai se na te po mai i lou alafau taumatau, ia e liliu atu ia te ia le isi. O le fia fai se faamasinoga ma oe e ave lou ofu tino, ia e tuu atu foi iai ma lou ofu tele. Ai se na te tauanau mai lua te o ma ia i le maila e tasi, ina o ia oulua ma ia i maila e lua. Luka 6:29: "O le po ia te oe i le tasi alafau, ina liliu atu iai le tasi; o le aveese lou ofu tele, aua e te vaoia atu foi lou ofu tino."

(2). O le 'law of retaliation', poo le mata i le mata, nifo i le nifo o loo taua i le Esoto 21:22-27 ma le Levitiko 24:17-22. Peitai e manatu nisi o loo faaaogaina e Mataio le Teuteronome 19:21: 'Aua ne'i e alofa ia te ia, a ia sui atu le ola i le ola, o le mata i le mata, o le nifo i le nifo, o le lima i le lima, ma le vae i le vae.'

O LE LAUGA

Tusi Faitau: Salamo 51:1-14
Roma 7:18-25

Matua: Salamo 51:10: “Le Atua e, ia e faia se loto mama mo a’u; ma ia e faafouina se loto mau i totonu ia te a’u.”

Manatu Autu: “E mai le Atua amataga fou.”

Ua masani la tatou faalogo i taimi e tima’i ma faala’ei’au ai e ta’ita’i i totonu o aiga, nuu, aulotu ma soo se faalapotopotoga, i se ua faato’ese ma faalalolalo i sana agasala ua sese ai. O se naunauta’iga ina ia toe taliaina o ia i totonu o se mafutaga. Ona faapea lea o upu a toelaiina: “Sole, ia toe timata le upega, ma ia toe afua se taeao, ia toe sasaa le fafao ma ia tuutuu i le loloto le tofa.” O lona uiga ia toe fuata’ina ni uiga mataga, i se amio lelei ma tausaa’fia, ia tutusa ma le olaga tausaa’fia o le toatele, ae ia iloa foi o loo sisila le Atua.

Le aano tonu lea o le olega a Tavita i le Atua, ina ia faamagaloina lana agasala, ina ua lagona le salamo ma ua fia fulitua i le leaga ua fai.

A silasila i le ulutala o le Salamo lenei, o le pese augani a Tavita i le Atua talu lana soli tulafono, ina ua mulilua i le ava a lana auauna o Uria. O le fati o le olega ma le faato’esega ina ia faamamaina ma faafouina lona tagata sese.

O le tala ua tatou masani ai le amio mataga a le tupu lona mulilua ia Patisepa. Lea ua alu atu ai Natano le perofeta e faailoa ia Tavita lana agasala, i

le tala faatatau i le mau’oa, ua fasia ma ‘aia le tama’i mamoe fafine sa faapelepele a le tagata mativa. Pe sa iloa pe le’i iloa foi e Tavita o ia lea o loo silafia e le Atua mea uma, ma e tau mai foi e tusa ma le agasala ua fai.

Ae talofa ua fasia lava le gata a o pupula nai ona mata. Ua oo ina oti Uria, ona o ana fuafuaga leaga. Sa leai se manatu e faia e se ua filifilia faapitoe e le Atua ina ia fai ma ta’ita’i o lona nuu. A manatu foi i le alofa iai o le Atua ma lavea’iina mai i le lima sau o Saulo, ma le tele pea o le agalelei o le Atua i lenei tagata, ae aisea e tali ai faapea i le alofa tele mai o le Atua? Le tagata na finagalo le Atua e ala atu ai sona viiga, a o lea, e fai pea lona loto, ma faamalie i lona tu’inanau.

Ae ui i lea, e faia pea e le Atua amataga fou. E saunia pea e le Atua laasaga fou e toe fo’i atu ai le tagata ua salamo, mai lana agasala. E loto faamagalo pea le Atua. Peitai ane o le alofa foi faale-Atua e auala mai i ni faasalaga. Ne’i tuua’ia e se tasi le Atua i lona faasalaina, ae o le finagalo o le Atua o ‘i, e lagona moni ai e le tagata lona sese. E toe tutupu ai lagona fou ma totogo a’e ai le moemoe fou o le loto toe fuataina.

Ua tatou iloa i le anapogi ma le tatalo a Tavita, ua alu foi le ao ma le po o ta’oto’oto i le eleele. O le faailoga o le tagata ua lagona lona salamo moni, ua lagona lona faatauvaa ma le leai o sona tulaga i luma o le Atua. Lea na mafua ai ona augani pea ma tagi atu i le Atua, ina ia faia

se loto mama mo ia, ma ia faafouina se loto mau i totonu ia te ia.

O le ola fia faafouina, o se olaga ua lelava i mea palapala o le olaga, le pisia soo o le olaga matagofie a le Atua ina ia ola olioli lana fanau. E leai se saisaitia pe faanoanoa foi, o le olaga e matamata tetele i soo se Kerisiano poo soo se soo o Keriso. O le olioli e le tutusa ma le ola fiafia aua o le fiafia e vave mavae pe a tuta’ia le sa i taimi faigata o le olaga. Ae o le olioli e loloto atu lona uiga e umi ona iai i se tagata tusa poo a faafitauli e fetaia’i ma lona faatuatua. O se fati e fou pea i le usu, ma maliu tiga le usu soo aua e leai se taimi e faa’u’u ai. E moe ma le malie o le loto, e ala usu ma le olioli i laasaga o le aso fou, e molimauina ma faafetaia lona Atua i lana foafoaga fou, o le ala foi lea o le augani faapea o le fai salamo, “*Aua foi e te aveeseina lou Agaga Paia ia te a’u.*”

Pau lea o le malosi e faamoemoe iai le tagata mo sona malosi fou; aemaise o lona fia maua o le poto moni mai le Atua, pe afai e mafutaina e le Agaga Paia. Le Agaga e faalototeleina le tagata i taimi e pagatia ai. O lona uiga, o le Atua i lona Agaga Paia, e foa’i i le tagata salamo ma faatuatua ia te ia Amataga Fou mo se ola fou.

“Ae ou te fiafia i le tulafono a le Atua i le tagata i totonu.” O lona uiga, e manaomia le loto ia salamo, ina ia tupu ma ola le faatuatua - Ia faavaivaia lagona faale-tagata, ae ia uluola lagona o le Atua.

I le manatu o Paulo, o le mea faaauau itulau e sosoo ai

O LE LAUGA

mai le itulau e 3
lea na faaali mai ai Iesu Keriso.
E le'i afio mai e ave ese atu le
tagata ma seoli ae tuuina i le
lagi. Leai! Na afio mai e
aveeseina le seoli poo le pogisa,
ae se'i suia i le malamalama o
le lagi o le faailoga o le amataga
fou.

E uma ese loa lagona o le
tagata, ona faatoa tonu lea o mea
uma e fai e le tagata. Aua ua na
o le Agaga o le Atua ua i totonu
o lea tagata. O lona uiga, ua
amiotonu i le amiotonu a le
Atua.

O le manatu o le aposetolo ia
faafiti le tagata mai ana agasala,
ae avea Iesu Keriso e fai ma
tulafono matamata tetele i le
loto. Aua o Iesu Keriso, o lona
Agaga, o le Amataga Fou ua
foaiina e le Atua i le tagata ua
salamo faamaoni mai agasala o
le tino.

O le fesili la mo i tatou le
Ekalesia, o le a so tatou manatu
pe a tatou mafaufau loloto i le
maliu ma le toe soifua
manumalo mai o Iesu Keriso?
Faapefea lo tatou auai i le
Sakalameta o le Faamanatuga?
Pe le o le tatalaina ea lea o
noanoataga o le agasala o
saisaitia ai le tagata? Pe le o le
toe avatu ea lea o le tagata i
luma o le Atua ua o se tagata
fou?

O se tasi itu, o le tauiviga
faifai pea lea a le tagata tapua'i
mo Iesu ma lana Tala Lelei mo
aso nei. Faatasi ai ma le Agaga
Faagaetia, ona o le alofa le
mavae o le Atua, mo lana tagata
na fai - tusa lava pe agasala.

O lona uiga, o le ola fou ma
le amataga fou lea ua foa'i mai

e le Atua, ina ia olioli loloto ai
le tagata, i le ola fou ia Iesu
Keriso. O la le aposetolo, "O
lenei, afai o ia Keriso se tasi, o
le tagata fou ia, ua mavae le ola
tuai, faauta ua oo mai le ola
fou."

Pau a lea o le mea tatou te fai,
o le taliaina lea o le Atua ma le
loto salamo ma le faatuatua
faamaoni.

Soo se Kerisiano e le ese le
ola faaletino ma le ola
faaleagaga. E iloga o ia ona o
lona fale, o le malumalu ua paia
mo le Atua. O lana laulau'ai, o
le fata faitaulaga ua ofoina iai
fua o ona lima ma lona malosi
mo le Alii.

*O le viiga i le Atua lona la'ei.
O le viiga i le Atua lana nofo
ma lona tula'i.*

*O le viiga foi i le Atua lana
saasaa ma lana taalo.*

*E vivii i lana moe ma lona ala
e tapua'i i sekone uma o lona
olaga.*

*E tatala pea lona loto e
ulufale ai Iesu ma nofo tumau.*

O foliga na o le tagata ua ola i
le Amataga Fou mai le Atua, ina
ua salamo ma faatuatua
faamaoni ia te ia.

Ia ia te ia pea le viiga, nei ma
ia faavavau lava.

Amene.

Saunia e -

Fata Tufue,

EFKS Maasina, Fagalao
(O le lauga e sui ai le lauga na
faatulagaina e le'i taunuu mai)

Taumafa Maloloina ma le Tusi Paia

(Healthy Eating and the Bible)

saunia e

Eperoni Futi

Kolisi Faafaifeau Malua (Pepa mo le Fono Tele 2010)

O le autu faatulagaina o le pepa
e pei ona faataatia mai e le Ofisa o
le Fono Tele, ou te manatu o se
autu talafeagai ma le Fono Tele ma
nei foi vaitau. O se tasi lenei o
mea e matauina i le Fono Tele, o
le anoanoa'i o meaai. O le mea
mautinoa foi, e le itiiti se vaega o
nei taumafa ua le lelei ona faaaoga.

I le vaitau la o le afaina o le
soifuaga i le tamaoiga, atonu o se
tasi lea o feau. Lona lua, o se tasi
o to'atuga o nei aso, o le
faatupula'ia pea o gasegase ua
faavasegaina o gasegase le pipisi
e pei o le suka ma le toto maualuga.

O se finagalo ua fausia e foma'i
ma le au tausii soifua, o nei
gasegase e mafua ma fesoota'i ma
taumafa ua tele ina faaaogaina e

tagata.

I le vaiaso nei lava, i se lipoti a le
Fale Faamama Toto, ua ta'ua le
siitia maualuga o i latou ua
faamamaina toto. Ua to'a 54, ma
le to'a sefulu o loo faatalitali
se avanoa. E faatalasua se
saunoaga a se tasi o Faifeau
Toeaina sa ma auai faatasi i se
maliu, ae moni. Sa ia faapea ai,
(tulou le gagana), "O le tele o
gasegase o loo aafia ai tatou e
mafua lava o tainifo." E fealofani
le finagalo o le Faifeau Toeaina lea
ma upu faa-Peretania e lua e
faapea:

* Many people have dug their
own graves with their own folks.

* Supper has slain as many as the
faaauau itulau e sosoo ai

O le Faato'aga o le Loto: O Iesu ma le Alafau Taumatau, Ofu Tele ma le Maila e Tasi

mai le itulau e 2
180). O lona uiga, e faailoga fesili le faia e le matai poo se isi tagata o sea gaoioiga e pei ona saunoa le Alii.

(ii) I le ma lea, o le taimi lava e faaaoga ai e se 'matai' poo se isi tagata se 'tu'i' (closed fist), e faaoo ai se manu'a i le 'auauna', o le taimi lava foi lea, ua tulaga tutusa ai i la'ua, e le gata i aia tatau faale-tagata soifua, ae faapea foi ma isi vaega o le soifuaga(6). O lona uiga, o se lagona o i le Alii, ailoga e iai se 'matai' e toe fia oo i sea tulaga, o le tumua'i tutusa ma ana auuana? O lona uiga, e ao lava ona toe mafaufau muamua, a o lei faia se gaoioiga

faapea, e ono faamanu'alia ai le finagalo o le isi tagata.

(iii) Na pau lava le gaoioiga lea e avanoa mai mo le 'matai' o le faaaoga loa o le 'tualima' (back-handed strike) i lona lima taumatau, e fesoota'i ai ma le alafau taumatau o le 'auauna'. O le faaaogaina o le 'tualima', o le tasi lea vaega ogaoga o le sauaina o soo se tagata na atagia i lea foi vai tau. O le faamoemoe e le gata ina faamanu'alia ai le isi tagata, ae ia matua faalumaina (humiliate) ai foi le isi uso-a-tuaoi. O le ala foi lea na faatulaga ai ni faasalaga tau tupe mo e faia ia faiga faalealofa. O le sala o le 'tu'i' e 4 zuz (zuz - o le totogi, 'wage' o

le aso e tasi); o le 'po' e 200 zuz, ae o le tualima e 400 zuz.

I lona aotelega, e faafaigata ona faaoo se po, tu'i poo se tualima i le 'alafau taumatau' ona o tulaga ua ta'ua i luga. Atonu o loo malamalama foi tagata o loo faalogologo i a'oa'oga a Iesu i lea lava aso i ona lagona ootia, aemaise lava i le faaaogaina lea o le 'tualima' e faalumaina ma taotaomia ai le isi tagata. Peitai, o lea ua fofola mai e le Faaola, se tali mo i latou o loo sauaina pea, e ala i se lu'i tele, o loo faapea mai ai le tagata o loo sauaina:

"Uso, a mae'a loa le alafau taumatau, taumafai mai la i le alafau tauagavale lea ua avanoa atu. Faaoga mai le 'moto', a le o lona, faamasau mai le

faaaou itulau e 9

Taumafa Maloloina ma le Tusi Paia

(Healthy Eating and the Bible)

mai le itulau e 4
sword.

O lona uiga e fai foi o le taumafa ona o le fia ola, ae ua aafia foi le soifua ona o taumafa.

Mea Taumafa i le Tusi Paia

O le tagata i le Feagaiga Tuai e masani ona faamatalaina i le upu Eperu o le "nephesh". O lenei upu e mafai ona faasino i le ola (life force) poo le agaga. E mafai foi ona faasino i le tino o le tagata. O lona uiga o le atoaga o le tagata e aafia ai le ola poo le agaga ma le tino. Ina ia tupu ma ola le tagata, e ao ona fagagaina i meaai talafeagai e mautinoa ai le maloloina o le tino ma le agaga. E faalagolago le ituaiga ola e ola ai le tagata i meaai poo taumafa e taumafa ai. Atonu o le atoaga foi lea o le mau tau'ave a le Soifua Maloloina - "You are what you

eat". E ui mo le Soifua Maloloina o loo faatatau i le maloloina o le tino, peitai mai le vaai faale-Tusi Paia, o le sootaga o taumafa ma le tagata e loloto atu, e le na o le tino ae aafia ai ma le agaga.

E lua vaega taua e faatatau i taumafa aemaise i le Feagaiga Tuai e fia faatalanoaina.

Muamua, o le taua o meaai e faamausali ai sootaga vavalalata a i latou e taumamafa ma faasoa faatasi se taumafataga. O le taumamafa faatasi o se tasi lea o faailoga o se sootaga mafanafana, a o se sootaga foi e fefaatuatua'i (Salamo41:9). O le fetuatuana'i foi e fai ma faailoga le musua e taumamafa faatasi (Kenese 43:32) O le avea o le taumamafa faatasi e fai ma faailoga o sootaga mafanafana, e manatu e mafua mai totonu o le lotoifale faale-aiga. Aemaise lava i le sootaga faale-

tina ma lana pepe a o faasusu. O le sootaga lea e suia mulimuli ane pe a matua, ma tuu atu le tausiga i le tama o le aiga, o ia lea o le a feagai ma tiute o le fagagaina o le aiga. O le tiute fefaasoa'i lea i totonu o le aiga e fai ma faavae o le faaaogaina o meaai, poo se taumafataga e fai ma faamaufaaailoga o se feagaiga poo se sootaga ua tau osiosi.

E ese le taua o le ata lea o le fagagaina e le tama ma le tina o le aiga. Aua o le ata foi lea o loo tauave i le va o le Atua ma lona nuu o Isaraelu, talu ai o Isaraelu ua avea ma aiga o le Atua (Amosa 3:1) O le eseesega tele lea o osiga taulaga a Isaraelu ma malo tuaoi o Sasa'e Tutotonu. O osiga taulaga a malo tuaoi nei e pei foi o Isaraelu e faatino i meaai, peitai mo nei malo tuaoi o mea'ai e mo taumafataga a o latou atua. Peitai o Isaraelu. e le fagagaina e tagata le Atua, ae o le Atua o ia o le na te foaiina meaai mo le tausiga o ona faaaou itulau e 9

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA -

Na aumaia a'u e ala mai i le vasa lava lea o le pogisa ma le oti lea na ufitia uma ai le lalolagi, ma saisaitia ai i filifili tagata uma, ma tapunia ai i le oti tagata uma. O le mana lava lea e faavavau o le Atua, lea na aumaia a'u mai totonu o ia mea, o le mana lava lea na luluina mulimuli ane malo, patele, polofesa, ma tagata uma.

Ua leva lava ona ou mafaufau, pe ua iloa e le tatou auga tupulaga, pe e iai foi so latou talitonuga, o sa'olotoga e tele o tatou fiafia ai i nei aso, na mafua mai lava i le galuega faamisiona a se tasi o perofeta aupito ta'uta'ua ua ola mai i lenei lalolagi - o Siasosi Fosi.

E ta'u loa lona igoa, e vave lava ona oso mafaufau o tagata ma fai mai o Siasosi Fosi o ia lea na faavaeina le *Quakers*, poo le Sosaiete a UO, poo le *Society of Friends*, o se Sosaiete a tagata Kerisiano. E manatu nisi o lea vaega faa-faapotopotoga laitiiti, tu'ese mai le mea o iai le toatele, amio filemu le 'au faatuatua ma e fai o latou pulou, ma ola i faato'aga i vaega i tua o le atunuu, ma e lauiloa i lo latou amio sa'o ma le faamaoni.

Peitai na foa'i atu e Siasosi Fosi se vaega tele o lona ola i isi galuega e tetele mamao atu i lo lona faatonuina o ituiga la'ei e tatau, ma se olaga faifaato'aga. A o le mea moni na matua ma'ema'e o ia i ana taumafaiga e faalauteleina le salalau o le Tala Lelei, lea na ala ai ona tula'i mai le *Salvation Army* (O le Autau o le Faaolataga) i le luaselau tausaga mulimuli ane, lea na faatuina e William Booth. Na fesoasoani tele talitonuga o Siasosi Fosi i le faavaeina o lea lotu poo lea faapotopotoga.

Fai mai se soupu mo le *Salvation Army*, ana tutumau le *Quakers* i o latou ulua'i talitonuga, e le

mana'omia mulimuli ane se *Salvation Army*.

E talitonu lava le toatele o tagata, o Fosi na ia ta'ita'iina le vaega na latou manana'o ina ia faia ni suiga tetele i le Toe Fuata'iga. I lo'u la talitonuga, o lona uiga o lea mea, o Fosi na ia toe siitia le Toe Fuata'iga i le isi laasaga i luga, - o le a lea? O le tuufaatasia lea o le Agaga ma le Upu.

Ua faia e Fosi le mea na faia e ulua'i apositolo, lea foi na faia e i latou ua ta'ua o Toe Faafouina mulimuli ane. Na ia toe faafou, pe toe amata, le tuufaatasia o le Agaga ma le Upu, ma, i lea faiga, na ia sopo'ia ai faiga faa-Kalavini ma mafaufauga faatapua'iga, ma ua faafaigofieina ai ona maua e tagata le olaga faa-Kerisiano mo i latou uma e talitonu. Na amata e le Sosaiete o Uo - *Society of Friends*, le toe fo'i i le galuega a le Agaga Paia i le ola i aso uma o soo se tagata faatuatua, lea ou te talitonu na sauniunia le ala mo le misiona i le senituri e sefuluvalu ma le sefuluiva. Ua avea nei le Agaga Paia ma Uo Mamae - *Friend* - a soo se tasi e mulimuli i a'oa'oga ma talitonuga o Fosi.

Ona o le latou fesoata'iga ma le Agaga Paia, pei ua toe laga ai e le 'au Uo, *Society of Friends*, nisi o vaega o le faa-Kerisiano ua leva ona galo atu, pe ua le toe manatua lava. O i latou le vaega muamua na latou u'una'ia le faamisiona a tama'ita'i, ma latou matua

lagolagoina ia tama'ita'i a o latou laugaina ma a'oa'oina le Upu i le lalolagi uma. Ua faamaonia foi ona pau lea o se vaega sa iai i ia vai tausaga, na latou tuli'esea temoni, faamalolo ma'i, ma faia vavega i le mana o le Atua. E moni lava foi sa iai nisi vaega o tagata na malamalama i le taua faale-agaga, a o Siasosi Fosi na ia faatinoina i lona ola i aso ta'itasi. Na matua a'oa'oina atu ma le malosi e Fosi le Roma e 8:14 lea e faapea mai: "Aua o i latou uma ua ta'ita'iina e le Agaga o le Atua, o atalii i latou o le Atua." Na ia faatino lea fuaiupu i vaega eseese o lona ola i aso taitasi. Na faamamafa i ana a'oa'oga le ta'ita'iga ma le fesoasoani a le Agaga Paia e tatau ona faamuamua i soo se vaega o le olaga.

Na tu malosi o ia i le mea moni e faapea, o le avea ma Kerisiano e le o se mea na fanau mai iai le tagata, poo se mea na maua ona o le auai i sauniga lotu poo le papatisoga. E le tuuina atu i se isi ona ua ia maua se faailoga tikeri mai se a'oga faafaifeau. I le talitonuga o Fosi, o le tagata Kerisiano moni, o ia lea na te iloa lelei Iesu Keriso o le Alo o le Atua, ma faalagolago i aso uma i le fesoasoani mai a le Agaga Paia, i le faamalalamaina lea o le Tusi Paia, ma ola ai i luga o ana tulafono, i totonu o lenei lalolagi pi'opi'o ma le fai mea sese. A faapuupuu, na talitonu Fosi o le Kerisiano faamaoni e ola i mea tonu ma le sa'o ua uma ona ia ta'utino ma talia.

E foliga faigofie i le vaai atu iai, ae matua tele se tau na tologi e Fosi mo ia mea. A o faagasolosolo lenei mataupu o lenei tusi, o le a e ofo pe a e faitau atu iai, ona o nisi o sa'olotoga o loo e maua i lenei taimi, na fanau mai i talitonuga ma'a'a a'ia'i sa ia Fosi, atoa ma le faafalepuipuiina soo o ia.

I lenei mataupu, o le a ou tautala e uiga i ona uiga, ma le lu'itauina faaauau itulau e sosoo ai

Le Lalolagi e!

Na vili mai le pule o le a'oga e a'oga ai la'u tama o Sikoti ma fai mai pe mafai ona oo mai ma te feiloa'i ona e iai se mea taua e fia talanoa mai ai ia a'u.

Ua latalata i le faauuga a le a'oga, na ou manatu ai ai o se mea e uiga i le sauniga lea. Ae na ou tau matemate fo'i, pe le'i faia foi e Sikoti se mea sese i le a'oga. Ona ou faatalitali ai lea i le taunuu atu o le pule a'oga.

O le tala fou, e matua lelei lava mo Sikoti: o Sikoti na te faia le lauga a le a'oga o le laugatogi ma le faauuga. Ae o le samiga la o lea faaeaina, ua tuu

mai ai e le pule ia te a'u ou te tusia se lauga a Sikoti. Na ou tali i le pule ou te matua fiafia lava e tusi se lauga, ona o lo'u fiafia i le lelei o le a'oga a Sikoti.

Na ou nofo i la'u laau lomitusi ma ou mafaufau i le faasolosolo mai o le olaga o Sikoti. Ona ou manatua ai lea o le taua o lea sauniga mo Sikoti ma i latou uma o le a faauu. O le mea moni lava, o le a tuua e Sikoti ma isi tamaiti a'oga le siosiomaga o le a'oga, ae ulufale atu i le lalolagi lautele. O matou matua o le a matou le toe iai i aso uma e fesoasoani ma faatonutonu ma tausi latou. Ona ou tusia ai lea o le tusi lenei i le Lalolagi:

To the World:
Le Lalolagi e,

E i'u nei ma le a'oga a matou fanau. O se mea fou ma le ese lo latou oo atu i le isi laasaga o lo latou ola, o le mea lea ou te talosaga atu ai ina ia e alofa ma e vaaia ma le alofa i latou. Aua, silasila, o i latou lava o posi, poo tama autu o mea sa latou ola ai, lea sa iai pea o latou matua latou te milimilia o latou ma'osi'osia ma toe faafou o latou lagona ta'eta'ei. O lenei la o le a ese le mea o le a iai. O le a iai lu'i fou o le olaga, o ni lu'i e le taumate e fetai'a'i ai ma taua ma mala e oo ai i le faanoanoa. O lo latou asa atu i nei mea uma e mana'omia ai le anoanoa'i

faauuau itulau e 12

O SIAOSI FOSI

O LE NA IA FAASA'OLOTO LE AGAGA - 1624-1691

mai le itulau e 6 o ia faale-agaga. O se tagata mata'utia foi lea tagata. O le a le mafai ona ou tolaulauina le tele o mea na ia faia, o ni mea maoa'e, faigata, atoa ma ni fe'ese'esea'iga uiga ese sa aafia ai lona ola a o finau mo ona talitonuga. Ou te fautuaina oe, ina ia e su'esu'e ia Siasosi Fosi, ma sa'ili uma ni tusitusiga e uiga ia te ia, ma le agaga faa-Toe Fuata'i sa u'una'ia o ia.

Ua Fanau mai se Tagata Toe Fuata'i

O le tausaga e 1624. O le nuu o Leicestershire (Leitasia) i Egelani. O Maria Fosi, e le taumate faato'a luasefulu ma ona tupu ona tausaga, ua fiafia ina ua to o ia i lana tama muamua. O lona to'alua o Kirisitofa (Christopher), o se tagata faamaoni ma lotu i le Ekalesia Perepereane, e matua mamao ia Maria. E lauiloa le igoa Fosi i le nuu. E iai le faamaufaailoga a le aiga e iloa ai lo latou totoa i taua, ma avea ma mea latou te faatauaina ai lo latou tupu'aga ma lo latou gafa. O le aiga foi sa latou lagolagoina se

vaega o Kerisiano e ta'ua o Lollards (Lolata), o se vaega sa salalau i itu uma o Europa. O ia tagata sa latou folafola e latou te faitauina o le Tusi Paia mo latou lava, ma faamatalatalaina e latou, i totonu o se aulotu faavaeina, e ui lava e tetee iai pulega faale-malo.

Na faamautu Kirisitofa i Leitasia, ma fai se fale mo ia ma lona toalua. E lelei le galuega na ia maua, ma avea lea ma mea na faitauina ai lona aiga i totonu o aiga iloga o le nuu o Leitone e tu i luga o mea maupu'epu'e i Egelani.

Ua oo i le masina o Iulai na fanau ai Maria i lana tama muamua, o le tama na la faaigoaina ia Siasosi. E iai isi tamaiti a le ulugalii, pe to'afa, e le mautinoa lelei ona e le'i teua lelei ni faamaumauga. Pe to'afia le fanau na maua e le taua lea, tasi lava o lea, sa faapitoa se faiga o Siasosi, le ulumatua.

E Ese lea Ituaiga Tamaitiiti

Afai na iai se faamoemoe o le a ola a'e Siasosi e pei o isi tamaiti, ia, e le'i taunuu. E le taalo i ni taaloga e pei o isi tamaiti. E nofonofa i se tulimanu ma

mafaufau ai. A o laitiiti lava, na te matauina lelei tagata matutua ma o latou uiga, tagata ia e o ane e asiasi atu i lona tama.

O Viliamu Peni (William Penn) lea o le a ou talanoa i ai i se vaega mulimuli ane o le tala ona e tele sona sao i le *Quakers*, na ia tusia se lipoti e uiga ia Siasosi e faapea: "E foliga mai e ese lava ia i lo isi tamaiti, e fiafia i mea faalelotu, e le talanoa, e nofonofa lava, ma ia matau mea o tutupu. E ofo tagata i ana tali e fai ane i ni fesili, ona e faaalua ai le matua o lona mafaufau pe a faatusatusa atu i ona tausaga e laitiiti, aemaise lava i mataupu tau le Atua."

E ui lava e matua le malamalama lava Maria Fosi i lana tama ma ona uiga e ese lava mai isi tamaiti ma o latou uiga faa-tamaiti, ae ua talitonu Maria o lana tama e potoma talenia, ona ia faafaileleina ai lava lea o si ana tama, ae na te le'i taumafai e faamalosi ina ia taalo ma ola e pei o isi tamaiti. E lelei lava le va o Siasosi Fosi ma lona tina, e ui lava e le malamalama lelei o ia i ona talitonuga, ma e sea sea ona vaai iai ina ua matua. Na fualoa le ola o Maria, ma loomatua ina ua maliu. O le taimi lea ua sili i le limasefulu tausaga o Siasosi. Na matua'i tagi o ia ina ua oti lona tina.

O le Faato'aga o le Loto: O Iesu ma le Alafau Taumatau, Ofu Tele ma le Maila e Tasi

mai le itulau e 5 tualima i lou lima tauagavale. Ae ia e manatua lelei, o a'u foi le isi tagata ola, na faia e le Atua, e pei foi o oe."

Ae faamata, o le a se tali a le *master, husband, Roman*, poo se *superior* i lea lu'i ua faataoto mai e le *slave, wife, Jew, inferior* ma isi o loo taotaomia ma sauaina?

(i) Ofu Tino ma le Tagata Mativa

E manino ma malamalama tulafono(6) a Iutaia i le faaaogaina o 'ofu tino' poo 'ofu tele' e fai ma 'pledge' (tuu faafaatau poo se faamau) mo se nogatupe. O tagata matitiva foi ma vaivai le tamaoiga, o i latou ia latou te avatua ofu e 'faamau' ai se nogatupe. Peitai a faaletonu loa tuutuuga mo tupe sa nono, ona molituina loa lea i luma o le faamasinoga mo se faaiuga, e aloa'ia ai faaletulafono le avatu o le ofu tino lea sa 'pledge' e sui a'i le tupe. Ae faauta i saunoaga a le Alii o Iesu: 'a fia fai se faamasinoga ma oe e ave lou ofu tino, ia e tuu atu foi iai ma lou ofu tele'. Aisea ua saunoa ai faapea le Alii? E manatu le toatele, o lea ua aumai tuusa'o e Iesu le lu'i mo le tagata e ona tupe sa nono atu, ma faapea ai:

'Uso, o lea o le a avatu pea le ofu sa 'pledge', ae e le na o le pau lena, o le a tatala atu foi ma le ofu o loo ufiufi ai lo'u tino!

O lona uiga, o le a tutula'i lenei tagata i luma o le faamasinoga, e aunoa ma se la'ei o pipii i le tino, poo ua le lavalava fo'i (tulou). O le agaga ina ia masiasi le tagata ua molituina le tagata mativa e tusa ma le auala ua uia ai le faamasinoga. E mafua lea talitonuga, ona o le 'le lavalava' (nakedness) e matua'i tapu lava i le tu faa-Iutaia. E le gata i lea, e aupito sili foi ona ogaoga le maasiasi o e latou te molimauina sea tulaga i se tagata.(8) O le faamoemoe o saunoaga nei a le Alii - o le o loo tagi, faatasi ai ma i latou uma o loo auai i le faamasinoga, o le a silamio i sea vaaiga le talafeagai, a o se mea lava na mafua mai ia i latou lava.

O lona uiga, afai o mafaufau se tasi e molia se tagata mativa i le tulafono, e ao ona toe mafaufau ane, ma mafaufau ifo le tagata i lona lava loto, pe o se tulaga talafeagai le faamuamua o le ofu tele/ofutino ae galo ai le va nonofo. E le o le finagalo o Iesu, ia avea ana saunoaga ma 'alofaga o le le totogia o se nonogatupe. Ae ua na o se faamanatu mo e maumea, le tulaga le 'a'u'a'u o le faasoia, ma

le mativa na'ua o iai nisi o vaega o le sosaiete. E le o le ofu la e ao ona faamuamua, ae ia silasila ma taga'i toto'a, i le va nonofo ai, i mea ane ua oia.

(ii) Le Maila e Tasi ma Fitafita Roma

O le puleaina e le malo Roma o Iutaia ma nuu tuaoi, na avea ma ala e uia ai e ana fitafita faiga saua ma le alofa i tagata o isi malo. O se tasi o ia faiga o le faamalosi lea o soo se tagata e maua i le ala, latou te amoina ato o loo iai a'upega ma isi mea moomia mo se taua, pe a laasia eleele o se nuu. E le o maua tonu e le upu 'tauanau' o loo i le tatou lomiga le uiga tonu o le upu poo le faia i se faiga faamalosi i le gagana Eleni. O lona uiga, e le o 'tauanauina' e le fitafita le tagata, ae o loo faia i se faiga faamalosi, le amoina o le ato. I faamaumauga mai le senituri 49 CE, o loo vaoia ai le faamalosi e se fitafita ona faia o se galuega i soo se tagatanuu, vagana se faatagaga tusitusia mai le pulega. O loo faamauiina foi i se tusi o le senituri 133-137 CE, faasalaga o se fitafita e na te faamalosi le fe'avea'iina e tagata o ni mea faigaluega o le taua, i tua atu o le maila e tasi ua faatagaina. E toso faatata i luma o le kovana, ma tuu iai se faasalaga aupito sili ona mamafa ma tuga. O la Iesu, o se faiga lava ina le amiotonu lea o loo faia e fitafita. Ae a fai lava ua oo i faaauau itulau e sosoo ai

(3). *E le o ta'ua i le molimau a Luka i le tala lava lenei e tasi, le upu 'taumatau' - o le manatu o nisi, o loo aga'i le fai evagelia o Luka e faamamafa pea le tuga o le 'tu'i', ae le o se 'po', e pei ona aumai ai e Mataio, ina ia saga faamatilatila pea le ogaoga o tiga o le faalumaina, e aafia ai se ua sauaina.*

(4). *O galuega le mama, e aofia ai galuega i totonu o fale maliu (funeral parlors, morgue), ma fale le ta'ua (toilets, bathrooms).*

(5). *I le sosaiete o Qumran, e oo lava i le faaaoga o le lima agavale e faasino ai se mea, pe pa'i atu foi i le isi tagata, poo se isi lava gaoioiga, (gestures), o le a faasalaina sea tagata i le umi pe a ma le sefulu aso.*

(6) Esoto 22: 26-27: Pe afai ua ia te oe le ofu o le lua te tuaoi na tuu faafaatau, ia e toe avatu lava ia te ia, a o lei goto le la; aua o lona pulupulu lava lea, o le ofu o lona lava tino; se a se mea e 'afu ai o ia'?

Teuteronomi 24:10, 12-13: "Afai e avatu e oe se mea ua aitalafu mai e le lua te tuaoi, aua ne'i e alu i lona fale e aumai ai lana mea ua tuu faafaatau. Afai foi o le tagata mativa o ia, aua e te moegaiina lana mea ua tuu faafaatau. A ia toe avatu lava ia e ia le mea ua tuu faafata a o lei goto le la, ina ia moe o ia i lona lava ofu."

(7) E mau eseese Mataio ma Luka i le vaega lenei o saunoaga a Iesu - poo le ofu tele (outer garment, Luka) poo le ofu tino (undergarment, Mataio) lea e faamau ai se nonogatupe. Ae i le tu masani lava ia a le Iutaia, o le ofu tele e masani ona fai ma faamau, o lona uiga, e latalata i le sa'o le molimau a Luka. Peitai i le faaaogaina i le gagana Eleni o le upu 'himation', e masani ona ave i le ofu tele, poo le ofu i fafo, ae pito i totonu le 'chiton' poo le ofu tino lea o loo pito i le pa'u o le tagata.

O le Faato'aga o le Loto: O Iesu ma le Alafau Taumatau, Ofu Tele ma le Maila e Tasi

mai le itulau e 8
sea tulaga, o le a se lagona o i le fitafita, pe a faafuase'i ona lagona le i'u leo o le tagata Iutaia o loo musumusu atu: 'Uso, o lea ua ta laasia le maila faatagaina, ae o lea e lava pea lou malosi, e tulituli atu ai le isi savaliga o se isi maila e le faatagaina'

O le lu'i ua taoto nei mo le fitafita, ina ia toe timata le upega, sei toe manatu ifo i le loto, poo talafeagai le tulaga, ua faatagisia nei e le tagata o loo mafatia, ma taotaomia i lalo o lana pule'aga. E peisea'i o se manatu o loo tulituliloa pea e le Faaola, o se tali mai a le fitafita pe a ia lagonaina se i'uleo faapea. E le o le finagalo o Iesu ina ia fai se faiga e tetee ai i le malo o Roma. Ae o le tulaga pagatia o loo feagai ma ona tagata, e ao lava ona faailoa pea ni ona

lagona, ina ia avea ma faamalosi'au mo le ua mafatia, ae o se famanatu foi mo i latou, o loo umia le pule, ina ia fuafua tatau, ma tausisi i le amiotonu.

Manatu Faaiu

E maoa'e lava le toa o le loto o le Alii o Iesu, e faailo mafatiaga o ona tagata. E le o le toa o le loto e 'tauimasui' ai, a o le agaga e toe faatulaga ai, ma toe atia'e mafaufauga lelei e tausisa ai le filemu. Ae o se apoapoa'iga foi ina ia toe silasila toto'a ifo lava le tagata i lona loto, o le faatoaga e fofoa ai le ola fetausia'i, ma le alofa i le tua'oi. O le alofa tunoa o le Atua na ia faasa'oloto le tagata mai le tele o saisaitiaga o le mafaufau ma le agaga - O le i'uleo lena o lea o loo tele i lu'itau ua aumai e Mataio (ma Luka) mo e o

loo faia pea uiga ma amioga le amiotonu, ma taotaomia ai le ola fesoota'i o lana fanau. O lu'itau o le alafau taumatau, ofu tele, ma le maila e tasi, e le uia ai ni faiga faatupu vevesi, ma oia ai tua'oi o le va nonofo. Ae ua na o se fagufagu foi mo e o loo saisaitia, e totogo pea malama o le Atua i 'loto' o e o loo faia pea faiga faalealofa, ma aafia ai nisi. Ae o le tiute lava ia o le tagata taotaomia, o le toe faamanatu, ma saga faatupu pea lagona o le 'alofa faale-Atua' ina ia toto, ia tupu ma ola, ma ia lauusi, i fatu ma lagona o i latou o loo faia uiga e le talafeagai, e tusa ma a'oa'oga a lo tatou Alii.

O le tatou olaina o se olaga e le tauimasui pe faatupu ai foi ni vevesi, o le maua foi lena e isi, o le ola toafimalie, ma e sologa lelei. Ae o se lu'i taua foi ua tuuina mai e Iesu, o o tatou tulaga faa-ta'ita'i, o le amataga lea o le faato'aga o le loto e tupuga mai ai le faia o le amiotonu faale-Atua.

Taumafa Maloloina ma le Tusi Paia

(Healthy Eating and the Bible)

mai le itulau e 5
tagata (Salamo 50:12-13; 78:19; 23:5).

O le taua lona lua o meaai e fia faamamafaina o le tausiga lea o le tagata. Ua ta'ua meaai o le tootoo o le ola". (Esekielu 4:16; 5:16; 14:13) Mai lava i le taimi e afuafua ai le tagata i le manava o lona tina, se'ia oo ina to lana manava, e matua moomia le fafagaina i meaai eseese. E tofu foi taimi eseese o le ola o le tagata, ma ituaiga meaai e fafagaina ai. A o laitiiti faato'a fanau e moomia le suasusu (1Korinito 3:2; Eperu 5:12-14) O le taua o meaai ua avea ai ma se tasi o ala e pulea ai e i latou o loo mau i meaai, e ua mativa i meaai.

I le Feagaiga Tuai, ua manino i le tala o le foafoaga, o mea uma

ua faaaogaina e avea ma meaai, o mea na faia e le Atua, ma i le mau a le tala o le foafoaga o mea uma ia ua lelei. E le gata i lea, ae o mea uma ua tuu i le tagata e pule ai. O lea pule e le gata o se pule faatausi-mea, ae o le pule foi o loo iai ma lona faaaogaina e avea ma meaai aua lava le tausiana o le tagata (ola poo le agaga ma le tino).

I le aoao tetele, ua mautinoa ai o laau uma e lelei mo le tagata. E iai tagata i nei aso ua ta'ua o "vegetarians" poo i latou ia e le taumafa i aano o manu, na o laau lava i o latou vaega eseese latou te faaaogaina mo taumafa. E anoanoa'i le tele o laau o loo ta'ua i le Tusi Paia e faaaogaina mo meaai. O le a ta'ua na o ni nai laau ona o le utiuti o le taimi.

GRAINS: O laau nei e ese le taua i taumafa o aso fai soo (stable food diet). E tele ituaiga grains ae lua lava ituaiga e sili ona taua, o le saito (wheat) ma le karite (barley). E iai ma isi e pei o le atasema (lentil), fua o le fue (beans), tokana (millet) ma le kaseme (spelt) Esekielu 4:9. Karite: (Ruta 1:27; 1 Tupu 7:1). Saito (Esoto 34:22)

HERBS: O loo faaliliuina o "laau oona" (Esoto 12:8; Numera 9: 11), poo le "faalumaga o laau aina" (Faataoto 15:17; 2Tupu 4:38-40).

* O nei laau e manatu nisi o loo faatatau i letusi vao (wild lettuce) faapea foi ma vine vao (wild endives). O ituaiga meaai ia e masani ona fesoota'i ma e matitiva.

VEGETABLES: Tanielu 1:12 - fua o laau; Teuteronome 11:10 - laau iti e 'aina; Roma 4:2 - mea e tutuupu i le elelee.

faaaauu itulau e 13

Mafuaaga o le Pese:

All Creatures of Our God and King

All creatures of our God and King, Lift up your voice and with us
sing Alleluia, Alleluia! Thou burning sun with golden beam, Thou
silver moon with softer gleam: O praise Him, O praise Him! Alleluia,
Alleluia! Alleluia!

Thou rushing wind that art so strong, Ye clouds that sail in heav'n
along, O praise Him! Alleluia! Thou rising morn, in praise rejoice,
Ye lights of evening, find a voice: O praise Him! O praise Him!
Alleluia, Alleluia, Alleluia!

Dear mother earth, who day by day, unfoldest blessings on our way,
O praise Him, Alleluia! The flowers and fruits that in thee grow, Let
them His glory also show: O praise Him, O praise Him, Alleluia,
Alleluia, Alleluia!

And all ye men of tender heart, Forgiving other take your part, O
sing ye, Alleluia! Ye who long pain and sorrow bear, Praise God and
on Him cast your care: O praise Him, O praise Him! Alleluia,
Alleluia, Alleluia!

Let all things their Creator bless, And worship Him in humbleness,
Oh bless Him, Alleluia! Praise, praise the Father praise the Son, And
praise the Spirit Three in One. Oh praise Him, Oh praise Him.
Alleluia! Alleluia! Alleluia!

O le Pese: All Creatures of Our God and King

O le pese lenei: **All Creatures of Our God and King** na tusia e se tasi o Kerisiano ta'uta'ua o le Ekalesia, a o tasi le Ekalesia Kerisiano, o St. Francis of Assisi (Sagato Faranisisi o Asisi - 1182-1226).

O lenei fatuga faaoso lagona e vivii, toetoe lava a maua i soo se tusi pese a le Au Kerisiano i le lalolagi atoa, na ulua'i tusia i le tausaga e 1225, e se tasi o tagata iloga i le tala faasolopito o le Ekalesia Kerisiano, o Giovanni Bernadone, lea e lauiloa i lona suafa o St. Francis of Assisi.

O ia o se tagata pa'ia sa tuuina atu lona ola i le tatalo ma le mafutaga felata'i ma le Atua, ma

oo ai ina ia faafitia mea e tele i lenei olaga, ae ola i se olaga mativa, i le vai taimi ua te'a le pa'u o le malo o Roma ae avea ma malo Kerisiano. Na tuuina atu lona ola atoa i le fealua'i lea mai lea nuu i lea nuu, ma laugaina le Tala Lelei ia Keriso, ma fesoasoani i tagata matitiva o Italia.

Na fanau o ia i Asisi i Italia i le tausaga e 1182. O le vaega muamua o lona olaga na avea ai o ia ma fitafita sa ola i se olaga soona fai ma le le taupulea. Peitai na liliu faafuase'i o ia i le 25 ai lea o ona tausaga. Ma fai ai lana folafolaga o le a auauna i le Atua i lona faaa'oa'o lea i le soifua o Keriso i soo se mea na te faia. E ui lava o

lona aiga o se aiga maumea, ae na ia fultua i lea tamao'aiga atoa ma lona tofi tuufaasolo mai lona aiga mauoloa, ae ia filifilia na o sina vaega e ola ai, a ua tuuina atu o ia atoatoa, fealua'i ai i lona atunuu o ia o se avefe'au a Keriso. Ina ua atoa lona 28 o ona tausaga, ona ia faavaeina ai lea o se Ituaiga ua ta'ua o le Franciscan Order of Friars, lea na tuputupu a'e ma avea ma se tasi o Ituaiga tele o le Ekalesia e auai se toatele o alii faapea ma ni nai tama'ita'i. O i latou ia na latou talia a'oa'oga a St. Francis of Assisi, ma ola i le ituaiga olaga mativa na ola ai le patele.

Na lauiloa Faranisisi i lona soifua latalata lea i lona siosiomaga ma le natura o mea o le laueleele ma le sami ma le vanimonimo. Na ia matauina foi le 'a'ao mamana o le Atua i mea o le Fofoaga.

O se tasi o fuaiupu mata'ina o se solo lea ua fiafia lava tagata iai i nei vai taimi, o se tatalo na fauina i ona mafaufauga loloto i le vai taimi o lona talavou, lea e faapea mai:

Lord, make me an instrument of Thy peace.

Where there is hatred, let me sow love.

Where there is injury, pardon, Where there is discord, unity.

Where there is doubt, faith.

Where there is error, truth.

Where there is despair, hope.

Where there is sadness, joy.

Where there is darkness, light.

O divine master, grant that I may not so much seek to be consoled, as to console.

To be understood, as to understand.

To be loved, as to love.

For it is in giving, that we receive.

It is in pardoning, that we are pardoned.

It is in dying, that we are born to eternal life.

faaauau itulau e sosoo ai

O le Pine o le Alofa Faavavau

Ua fiu foi i ti'eti'e i lenei mea mamao a o masau atu le ma taavale i le motouei, ona ma manatu lea e sili ona ma liliu i le ala e tau le uia e nisi, o le ala i le matafaga o tafaoga. O le taimi, o le tau mafanafana ua te'a. Ma na avea le ma malolo i se tama'i nuu tu matafaga ma mea na ou vaai ai i se mea e le mafai ona toe galo ia te a'u.

Na amata lava i se mea faatauvaa, o le mumu mai lea o le moli mumu faasinoala. A o ma faatali mo le suiga o moli faasinoala, na ou iloa atu ai se fale tuai mo tagata matutua. I luma o le fale o loo nofononofo mai ai se olomatua i se nofoa'ofe. O ona mata e peiseai o genogeno mai ia te au ma fai mai ou te alu atu.

O le taimi lea na sui ai moli o le ala. Na faafuase'i ona ou fai atu, "Simi, afe ma paka le ta taavale i le mea le la e avanoa mai."

Ua ma i fafo ma le taavale, ona ou tago atu lea ua 'u'u le lima o Simi ma ma savavali aga'i i le fale e tausi ai tagata matutua.

Ae fai mai Simi, "Faatali, ta te le iloa nisi i lenei mea." Ae o si a'u tauanau filemu ae malos, na tuu mai ai Simi.

A o le loomatua lea pupula toto'a mai ia te au, ua savali faano'uno'u mai ia te a'u, vaai fiafia mai ma sagisagi.

"Ua ou fiafia lava ua tu mai lau lua taavale." O le tala faafetai lea a le

loomatua. "Na ou tatalo i le Alii talosia ia lua afe mai. E mafai ona lua o mai mo ni nai minute?" Na ma mulimuli atu i le loomatua ma matou o atu i le poletito o le fale.

Na ou maofa lava i le aulelei o le loomatua. E faatinoiti, ae le pa'e'e. Na o ona si'usi'u mata lava e iloa atu ai ni nai manumi. O lona laulu se'ea sina, o loo faapatu i tua.

"E toatele lava tagata e ui mai iinei, aemaise lava i le tau mafanafana. Na 'ona tilotilo mai faamalama o a latou taavale ma latou iloa mai le fale tuai na o loomatutua o nonofo atu ai. A o oulua, na lua iloa mai a'u, Makerita Mefi, ma lua afe mai."

Na nofononofo laitiiti Makerita ona toe fai mai ai lea, "E toatele lava tagata e talitonu o tagata matutua uma ua galogalo mea ma ua tele ina le toe aoga i se mea. Ae tele lava mea matou te mafai ona fai, a 'ea?" Ua tago atu nei i se pine o faamau i lona 'ofu, o loo iai se ata, ua lotelote. Na fesili mai o ia i o ma igoa, ma poo fea ma te o mai ai. Ina ua ou tali atu o Baltimore, na matua fiafia lava Makerita ma fai mai, "O ina e nofo ai lo'u uso! I lona olaga atoa!"

Na ou fai atu iai, "E felata'i ma le mea sa ou nofo ai a o o'u laitiiti." Na ou fesili i ai i le igoa o lona uso, ae tali mai o Marie Gibbons!

"Oii! sa ma vasega faatasi!" O a'u lea.

"O la'u uo lelei lava."

E sili i le itula o matou talanoa ma Makerita. O lea lava matou te talanoa i mea sa matou faia a o matou laiti, ae tu atu le teine tausima'i ma le ipu vai ma fualaau e lua. "Malie, ua oo i le taimi e inu ai vai, ma lau malologa o le aoaui. E tausi lelei lou fatu ina ia tumau ona tata lelei."

"E mafai ona matou talanoa teisi ma a'u uo?" Ae faamalie ane ia Makerita ma fai ane leai leaga ua oo i le taimi o lana malologa. Na tago atu le tausima'i ma faatu i luga Makerita mai lona nofoa. Ona ma fai lea iai e ma te toe afe ane pe a ma fo'i mai i le matafaga o tafaoga i le vaiaso e sosoo ai, ma asi atu ia. Ae tali mai, "O se manaia!"

Na oo ona ma afe iai i le fale o tagata matutua. Na tuu mai e le tausima'i se tama'i pusa o iai ma se tusi. Na tago mai ua 'u'u lo'u lima a o faitau mai e Simi le tusi:

Uo Pele!

O nai aso ia ua te'a atu o ni aso ia aupito sili ona ou fiafia ai i lo'u olaga talu ona maluu si o'u to'alua o Henry, lua tausaga talu ai. O lea, ua ou maua se aiga ou te fiafia iai, ma e manatu tele mai ia a'u.

O le po ua mavae na popole ai le foma'i ona o lo'u fatu. Ae ui i lea, o lea lava ou te

faaaauu itulau e 12

O le Pese: All Creatures of Our God and King

E tele ni mea ofoofogia ma le mata'utia, o nisi foi o ni talatuu, e uiga i le soifuaga o Faranisisi e faigata ona faamatalaina. O loo maua i faamaumauga ni lipoti e uiga i ni feiloa'iga a Faranisisi ma le Alii Faaola, o se tasi o ia feiloa'iga, o le faaali ane lea o le Alii Faaola ia Faranisisi a o anapogi o ia i aso e 40 i luga o mauga maualuluga o LaVerne. Fai mai o lea faaali ane o le Alii ia Faranisisi, na fai ma mea na aliali ai i ona lima, vae ma lona tino,

manu'a ia sa aafia ai le Alii Faaola i lona sauaina ma lona faasatauroina.

O le pese: All Creatures of Our God and King, e mai se tasi o tusitusiga a Faranisisi e ta'ua o le 'Canticles of the Sun', faapea na tusia i le taumafanafana o le tausaga e 1225 a o toe tasi le tausaga ae maluu o ia. Na ma'i tigaina o ia, ma ua po fo'i lana vaai. Sa matua talitonu Faranisisi i le taua o viiga i sauniga lotu. E sili atu i le 60 viiga na ia fatuina mo le

monaseri. O le fati lauiloa o loo faaaogaina e le lalolagi o lenei pese, na ulua'i faia i Cologne i Siamani i le tausaga e 1623, ae na ulua'i lomina i le tusi pese i Egelani i le tausaga e 1906.

Learning:

To look is one thing. To see what you look at is another. To understand what you see is a third. To learn from what you understand is still something else. But to act on what you learn is all that really matters, isn't it?

A Page for Youth

ITULAU MO TUPULAGA TALAVOU

Le Lalolagi e!

mai le itulau e 7

o le faatuatua, alofa, faapalepale ma le iloa.

O le mea lea, lalolagi e, talosia o le a e vaia lelei i latou. 'U'u o latou lima ma ta'ita'i ma a'oa'o ia i latou mea e tatau ona latou iloa, ma, faamolemole lava lalolagi, fai ma le loto alofa.

E tatau ona a'oa'o ina i latou ma latou iloa, e le o tagata uma e sa'o, e le o tagata uma e tonu, ma e le o tagata uma e moni mea latou te fai. Ae ia a'oa'o ina foi i latou ina ia latou iloa, o le tufanua e iai lona tamalii; o le faipule pi'opi'o e iai lona ta'ita'i faamaoni, ma e le misia se fili ma le iai foi o se uo mamae.

E umi se taimi e fai ai lenei mea, lalolagi e, a'oa'o i latou ia latou iloa o le tupe e maua i le galuega e fai, e sili atu lea i lo le tupe maua fua. A'oa'o i latou ina ia latou iloa faia'ina, ina ia matua maua ai e i latou le loto fiafia pe a manumalo.

Ta'ita'i eseina i latou mai le matau'a, ia latou maua foi le mea lilo o le soisoi o'oo'o ifo i lagona. A'oa'o i latou ina ia latou maua se filemu i lo latou va ma lo latou Atua. A'oa'o i latou ina ia malosi o latou loto ia mafai ai ona latou lavatia le to'ilalo e mafai ai ona toe taumafai se'ia oo ina manumalo.

A'oa'o i latou ia mulimuli i le latou faamasinoga ae le o le taumulimuli i

le motu o tagata. Faalogo i tagata uma, ae ia 'ai filifili i mea o latou faalogoina. A'oa'o i latou ia latou maua le fiafia i le taimi o le faanoanoa. A'oa'o i latou ina ia 'aue le faatusatusaina i latou i isi tagata, aua o isi e lelei, a o isi e le lelei.

Lalolagi e, alofa ma tausii ma le faaeteete i latou, ae aua le faamatananaina. Aua o le vela o le afi e iloa ai le u'amea moni. Ia malosi lo latou faatuatua ia i latou lava, aua o le mea lea e tupu mai ai lo latou faatuatua i le fanau a tagata.

Ia lalolagi e, e umi lava la'u lisi, ae tuu atu pea pe o le a sau mea e mafai iai. E lelei lava nai fanau, a matou fanau.

O le Pine o le Alofa Faavavau

mai le itulau e 10

malosi ma ou fiafia. 'A 'o o'u iai la i ia lagona, ou te fia faafetai atu ai ia oulua mo le fiafia na oulua taufai aumai mo a'u i lenei vaega o lo'u ola.

Beverly, o le meaalofo lea mo oe, o le pine na faamau i lo'u 'ofu i le aso na ta feiloa'i ai. O le pine mai lo'u to'alua na ia tuu mai i le aso na ma faaipopo ai, luni 30, 1939. O se pine mai lona tina. Fiafia e faaoga, ma e ou te moomoo o le a iai se aso, e te tuuina atu ai i lau fanau teine, ma a latou fo'i fanau. E faamealofo atu

le pine faatasi ma o'u alofaaga e le uma mo oe. O Makerita.

E tolu aso talu le ma asiasiga mulimuli lea, ae malii Makerita a o moe filemu. Na tafe ifo o'u loimata a o o'u milimila le pine i lo'u lima. Na ou liliu a'e le isi itu o le pine siliva, ma ou faitau ai i upu o loo tusia ai: "O le Alofa Faavavau".

tusia e Beverly Fine,
faamatalaina e
Afemata T. Apelu Aiavao

Forgiveness

We are most like beasts when we kill. We are most like men when we judge. We are most like God when we forgive.

Future

Parents are not obligated to give their children a secure future, but they are obligated to give them a secure foundation on which to build their own future.

O Talavou ma le Faaolataga

O Sir James Falshaw, (Semisi Folosoa) sa ta'ita'ifono muamua i le kamupani o nofoaafi e ta'ua o le North British Railway Company. O ia o se uo mafana a le tupu tama'ita'i o Vitoria. O Semisi Folosoa o se tagata e lelei tele i mea tau tupe, ma o se faipisinisi mauoloa. Na fesiligia o ia a o ia auai i se 'aiga tele na fai e aloa'ia ai lona ma'ema'e i mea tau pisinisi, ina ua atoa le 80 tausaga o lona soifua. O le fesili na tuuina atu ia

Semisi, "Atonu e aoga mo alii talavou uma o loo auai mai i lenei po, o tagata e le taumate e tauva ina ia faamanuiaina a latou pisinisi. E iai se mea i lou soifua galue, se mea lava mata'ina, e mafai ona tusi iai lou lima ma e fai mai, o le mea lilo lea le mafuaaga o lou tamao'aiga?"

Na tu i luga Semisi, tu faasasa'o pei se fitafita ma tali mai, "E faigofie lava ona ou tali atu i le fesili. O le a se tamao'aiga ua ou

maua, manuia, ma le faaeaina ua faafaula'i mai i o'u luga, ou te manatu e mafua ona o le mea leni, na ou tuuina atu lo'u ola i le Atua ina ua faato'a sefulu lima ou tausaga."

Failauga 12:1: "O leni, ia e manatua le na faia oe i ona po o lou taule'ale'a..."

Faata'oto 23:26: "Lo'u atalii e, aumaia lou loto ia te a'u, ma ia fiafia ou mata i o'u ala."

**A smile is the welcome mat at
the doorway of kindness
(William A Ward)**

Taumafa Maloloina ma le Tusi Paia

(Healthy Eating and the Bible)

mai le itulau e 9

* E le pei o nei aso, o ituaiga meaai nei e faamamafaina e tatau ona iai i soo se aiga, aemaise lava i lona taua e tineia ai faama'i. I le Tusi Paia, e le matua iloga ia ituaiga meaai, e peiseai o le tasi nei ituaiga meaai e masani ona fesoota'i ma tagata matitiva e pei ona manino i le mau a Paulo i le tusi o Roma e pei ona ta'ua i luga. Lea foi e iloa i le tusi o Tanielu aemaise i le faatusatusaga i meaai e tele ua laulauina mai e le tupu o Papelonia. Mo Tanielu ma ana uo, e faalagolago pea i le tausiga o nai mea ia e foliga e faatauva'a, ae o mea ua foaiina e le Atua.

FRUITS: (fualaa taumafa mata). E sili atu ona lauiloa ma taua "laau aina nei i lo laau iti e 'aina. Ua iloa lea mea i le faasa ma le vavao ina ia aua nei faaleagaina "laau 'aina" nei i le taimi o se taua. (Teuteronomie 20:19-20). O se tasi nei o faiga masani a isi atunuu pe a latou li'oli'o (siege) se isi atunuu ma sauni e osofa'ia, le matua faaleagaina lea o laau 'aina nei. E tele ituaiga "laau 'aina' nei, ae na o laau e taua ma taatele o le a ta'ua (Faamasino 9:8-13)

* Olive: O le laau aina pito i taua lenei. O ona fua e mafai ona ai mata. Peitai o isi ona taua o lona suauu e faaaoga e kukaina ai meaai, e fai foi ma suauu o moli, e avea foi ma vai e faamalu ai se manu'a. O se vailaau foi e aoga e malolo ai se manu'a o se tagata. O lona fua foi e mafai ona tu'i e avea ma kulimi e faamomosi ai le tino.

* Mati: o ona fua e suamalie ma e mafai ona aimata (Isaia 28:4) Jeremia 24:2. E mafai foi ona faala ona fua ma teu e faasoaso mo meaai mo se taimi umi. E faaaoga foi e fai ai keke aemaise lava mo meaai mo fitafita (1 Samuelu

25:18). O se vailaau aoga foi mo manu'a aemaise ma'isua (2 Tupu 20:7, Isaia 38:21)

* Vine: o se laau e ola lelei ma fua lelei aemaise lava i vaega mauga o Iuta. O ona fua e ai mata pe a pula, (Isaia 18:5), pe faala foi ma fai ai keke vine (Numera 6:3; 1 Samuelu 25:18) O le sua o le vine e inu mata pe faamafu foi ma maua ai le uaina. E lua ituaiga uaina e mafai ona fai mai i le sua o le vine. Muamua o le uaina ua ta'ua o le Hemer. O le uaina lea e le'i leva ona faatu pe le'i lelei. Ma lona lua o le 'yayin;, o le uaina lea ua atoa lelei aso e faatu ai ma ua matua lelei. Masalo o le eseese lea o uaina sa faaaogaina i le faaipopoga i Kana lea na auai Iesu. O le uaina foi e maua i le sua o le vine e masani ona faaigoaina o le "suavine totototo e le suia" poo le "toto o le vine". (Teuteronomie 32:14)

E pei lava ona ta'ua i le taimi muamua, e tele atu ma anoanoa'i laau e faaaogaina mo taumafa o loo i le Tusi Paia, ae ua lava ia e fai ma faaitaiga. E tasi le mea ua mautinoa, e leai se faasa tele i laau e aina Ma e foliga mai o taumafa o loo faaaogaina ai laau, o taumafa e maloloina. O se manatu lea e tatau ona tatou faamalosi mai i le tala ia Tanielu ma ana uo i le latou tausiga na o ni laau aina ma vai, pe a faatusa i vai e tele ma uaina na tausi ai isi. Peitai mulimuli ane ina ua mavae le taimi faatulagaina, e sili atu ona tino lelei ma lalelei mata o Tanielu ma ana uo.

Mo manulele, manu fetolofi, manu vaefa faapea foi ma i'a; e le o tuu saunoaina. Peitai, ua iai tulafono e faavasega ai ituaiga manu ma i'a e faataga ona taumafaina. O ia tulafono o meaai (kosher; what is proper and appropriate, meaai talafeagai ma

faatagaina), ua faavasegaina faatatau i tu ma aga faale-tapua'iga, aemaise i tulafono o manu ma i'a e mama. O le isi lea faamaoniga o le mau e pei ona uluai ta'ua i le atoaga o le tagata i le Feagaiga Tuai, o le fafagaina o le tino e o faatasi ma le aafia ai o le agaga o le tagata.

O le faamaninoga o ia tulafono o loo faavasega ai manu mama ma talafeagai mo taumafa e tusa ai ma talitonuga faa-Iutaia, o loo taape solo lava i le Tusi Paia, ae sili ona manino i le Levitiko 11 ma le Teuteronomie 14. O le mea ua matauina i nei tulafono, e le o atagia ai se tulaga o ni meaai e maloloina. Aua o le fua o loo fua iai le tala feagai (kosher), e le o le itu tau i le soifua maloloina ae o le itu faale-tapuaiga. O le manulauti o loo tulituli matagau o le ola mama ma le ola faapaiaina o le nuu o le Atua. Pau o le mea, o le atoaga o le tapuaiga i le faa-Iutaia, e le na o le lotu i le sapatu, ae aofia uma ai le olaga atoa e oo ai lava i le ai ma le inu o vaega eseese lea o le tapuaiga. O lona uiga o le 'ai e le na o se tausiga o le ola, ae o le tapuaiga. Atonu o se taofiofi lelei foi lea e fesoasoani i le tausiga o le soifua maloloina, aua afai o le taumafa o le tapuaiga, o lona uiga e le tatau ona soona 'ai ma inu aua ailoga o se tapuaiga lena mea.

I le aotelega o ia tulafono, e lua ni aiaiga e ao ona faamalieina mo manu e ao ona faaaogaina mo taumafa. O manu uma e magalua o latou atigivae ma toe 'ai lana mama, o manu ia e mama ma faatagaina ona faaaoga mo meaai. O nei tulafono ua avea pea ma finauga, aemaise lava ona o le aafia ai o le puua o se manu e le mama. Masalo ona o le taua o le puua i le aganuu a Samoa, aemaise o se matai 'ai a le toatele o le atunuu. E toatele i latou i nei ona po e ala i su'esu'ega faafoma'i, ua iloa ai le fesoota'iga o le puua ma nisi faama'i. Peitai ailoga o le

faaauu itulau e 14

Taumafa Maloloina ma le Tusi Paia

(Healthy Eating and the Bible)

mai le itulau e 13

mafuaaga lea o le faasaina i le talitonuga faa-Iutaia. E tele foi mafuaaga ua lagaina e le au su'esu'e o le Tusi Paia, ae ua na o ni nai manatu ua mafuli iai le tele o finagalo faaalua o le a faaalua:

* *Sootaga faale-tapuaiga aemaise i nuu fapaupau.* I su'esu'ega i nuu tuaoi o Iutaia aemaise lava i nuu o sa Kanana, ua iloa ai le faaaogaina o puua (ma ta'ifau) ia latou osiga taulaga. E pei la o se faata'ita'iga o se Heti. E faaaogaina ai nei manu e osi ai taulaga e faalelei ai le va o aiga ua fevaevae'i, pe faamamaina ai foi se faama'i ua aafia ai le nuu poo se autau. O le faaaogaina o le puua e pei ona faaaogaina o le 'oti e Isaraelu i le faamamaina o agasala. E le gata la i nuu o sa Kanana, ae faapena i Eleni e faaaogaina ai foi le puua e osi ai taulaga i le atua tama'ita'i o Temetere (Demeter - vegetation goddess) aua lava le lausiusi o laau. O le faaaogaina o le puua (ma ta'ifau foi) ona o le taugofie. Mo Iutaia e le faaaogaina ni manu le mama e osi ai taulaga. O le fesoota'iga la nei ma atua faapaupau, aemaise o nuu o sa Kanana e manatu e mafua ai ona faasa ma ta'u le mama nei manu. Aemaise o nuu o sa Kanana o nuu ma tagata na poloa'iina Isaraelu e tafiesea mai lo latou tofi ma ia aua ne'i iai so latou fesoota'iga aemaise lava ma a latou tapuaiga.

* O se tasi o mafuaaga ona o le aga (hygienic) a lea manu aemaise i meaai e masani ona 'ai ai. O se tasi o tulafono o manu faasa, o le manu e 'ai i tino o isi manu. O le puua o se manu e 'ai i laau ma manu foi, e fua lava i meaai e maua. Ae sili ona le taliaina lona tu le mama ma le 'ai i otaota.

* Ole tausiga o le puua e le

talafeagai ma le soifuaga o le nuu o le Atua mai le amataga. O Isaraelu o se nuu na amata mai o ni tagata e maumausolo a o aga'i atu i lo latou tofi. O le puua e le o se manu e mafai ona feta'ia'i e pei o mamoe ma 'oti. O le faasaina la ona o se manu e le masani ai le soifuaga o le nuu o le Atua.

* O le mafuaaga mulimuli o le taumafaiga lava a le nuu o le Atua e tulagaese mai isi nuu. Atonu o le tasi lea vaega o le faapa'iaina o le vavaeeseina (holiness in separateness). O le isi auuala e vavaeeseina ai e ala i taumafa. O le mea lea o loo faaalua manino i le faamamafa o loo i le Teuteronome e 14:2-21, o loo tapeleni lenei vaega o le mataupu o loo talanoaina ai meaai faatagaina i le faamanatu o Isaraelu "o le nuu paia mo le Alii lou Atua."

O meaai maloloina la ma tala feagai i le Tusi Paia aemaise i le Feagaiga Tuai, o loo faatauaina ai le maloloina o le tino ma le agaga, aua o le atoaga lea o le tagata i le Feagaiga Tuai. E ui e le o matua manino mai se vaai faa-fomai, ae o le mea ua mautinoa, e taua tele foi le vaai faale-Tusi Paia e lagolagosua i le tausiga o le soifua maloloina.

E leai lava se mea'ai e matua leaga, ae leai foi se meaai e aunoa ma ni ona aafiaga e pei ona malie i le mau a le alii fomai i suesuega faasaaienisi o Dr Eletise Suluvaie i sana pepa i nai tausaga ua mavae i le Iunivesite o Samoa i le Papaigalagala. O ni faata'it'aiga sa ta'ua e le pepa lenei a le alii faiaoga sa ia ta'ua ai e faapea:

* O aano o manu fasi a le lelei ona faaaogaina e le tino, e faatupulaia ai le uric acid i le tino e mafua ai le gugu.

* O fualaau fai sua (vegetables) ma le susu foi a ova tele, e afaina

ai le vaai ma le maua ai se moe lelei.

* O meaai aano a le lelei ona faaaogaina e le tino e maua ai le suka.

* O vaitamini foi a le ova ma le mae'a lelei ona faaaogaina e le tino, e ono aafia ai i le stroke ma le ma'ifatu (heart attack).

Peitai o le faafitauli tele, e le o manu le mama, ae o tagata o le nuu o le Atua ua faigofie ona tosina pe faaososoina e militino ma mea le mama, pe o le soona naunau foi i aano o manu tusa lava poo manu mama. O le mea lea o loo atagia i upu o le Levitiko 11:44, "ia faapaiaina outou." E le mafai ona sau se aano o se manu le mama oso i luga o se ipu meaai. E mafua ona i luga o le ipu ma 'ai e le taggata, ona o le tagata ua ia tago fua iai. Ua foaiina e le Atua mea uma e lelei ma aoga mo i tatou, ae o i tatou ia tatou filifiliga i le faaaogaina poo le soona faaogaina foi e mafua ai ona afaina.

FAAFITAU LI:

E iai se lafoga e masani ai le toatele, atonu e mafua mai ona o nisi o talitonuga e pei o talitonuga faa-Eleni, o le tino e leaga na o le agaga e lelei ma paia. E le gata i lea ae o le faauiga sese foi o tusi e pei o le Mareko 7:14-23 lea e faapea mai e le leaga se tagata i se meaai e alu i totonu o le tino. O nisi nei o mau, faatasi ai ma le tele lava o faanoi ua faaoga e tagata e faamalie ai le laualo ae afaina ai le soifua maloloina. Afai o le ola o le meaalofa a le Atua, o lona uiga o lo tatou tiute lea o le aputiputi le meaalofa a le Atua. E aputiputi e ala i le fafagaina i meaai talafeagai. E ui lava o le tino ua na o se fale apitaga, e le tumau ma e pala, a o la le apisetolo o Paulo, "*O lenei le auso e, ou te aioi atu ia te outou, ona o le alofa mutimutivale o le Atua, ia outou tuuina atu o outou tino i le Atua, o le taulaga ola, ma le paia, ma le malie, o le mea lea e tatau ai ona outou faia.*" (Roma 12:1) E ogaoga foi le tautua ma le galue i aiga, o nuu ma le Ekalesia pe a maloloina le tino atoa ma le agaga. E matua le tatau la ona tatou faatalale i le tausiga o o faaauau itulau 15

O E UA MALILIU

Gogosina Faaiuga Aiono Tuuau Sao 8 Oketopa 1924-17 Oketopa 2015 (Tina Penisione)

Na soifua mai Sina i le aso 8 Oketopa 1924, ae faamanavaina e le Atua ana feau i le aso 17 Oketopa 2015. Lona uiga, ua 91 tausaga ma aso e iva le matua o lona soifua.

O ona matua, o le tama o Taua Malala i Fasitoota, a o lona tina o Tautautasiupuo Samoamai Sauai Analega, - mai Falealupo

Na faaiupo Sina ia Tuuau Sao, o le a'oa'o Malua i le 1945. Na valaaulia i la'ua e fai ma faifeau tausinuu i le Ekalesia i Vailoa Palauli, i le 1946-1981.

Na galue Sina o le faletua o le faifeau, o le tina o le aulotu, mulimuli ane ta'ua o ia o le Tina o le Pulega ma le Matagaluega ina ua avea i laua ma Faifeau Toeaina o le Pulega. Na oo lava le tautua a Sina i le Ekalesia Aoao, ina ua filifilia Tuuau e fai ma Taitaifono o le Fono Tele a le Ekalesia Faapotopotoga Kerisiano Samoa i le tausaga e 1979, 1980, 1981.

A o galulue Sina ma Tuuau i le

galuega, sa tele tofiga sa tau'aveina e Sina. Sa fai o ia ma sui o le Mafutaga a Tina i le Komiti Tupe, sa fai ma sui Peresitene i le Sosaiete Tautua Puapuaga Tagata, ma avea mulimuli ane ma Peresitene o le TPT. Na filifilia foi Sina e fai ma Taitaifono i le Mafutaga a Tina o le EFKS.

Na tatala le mafutaga a Tuuau ma Sina ma le aulotu i Vailoa, ina ua faamanavaina e le Atua fe'au a le tama i le 1981. Na tuua e Sina ma le nofoaalo Vailoa, ae see mai loa i lo la maota i Apia-uta i Vaivase-uta. E le'i iai se taimi na mapu ane ai Sina mo se malologa, ae na taunuu mai loa i Apia-uta ma toe faaaau lona soifua tautua i le galuega a le Atua.

Ma te amata galulue i Apia-uta i le 1985, ua galulue Sina ma si fanau, ua fai le latou matafale. O le taimi lea o loo malosilava le tina o Sina. Sa fai Sina ma faia'oga Aso Sa, faato'a uma lava lana faia'oga Aso Sa, ina ua matua, ua alofa i lona soifua i le tino, aua poo le a le pogisa o le po, e auai mai lava Sina i a'oga a faia'oga. Sa fai foi Sina ma sui o le Au Talavou, ma o se mitamitaga lea i le faifeau, ona o sui matutua, e faufautua ma faamalosi i tupulaga talavou.

Faato'a tuua foi e Sina le Au Talavou ina ua le lava lona malosilava.

O se tina e fiafia i le Mafutaga a Tina o le aulotu. E faufautua ma faafiafia loto i sui o le Mafutaga, e faatupu ai lo latou fiafia e galulue ma fai mea sili mo le Alii. E tiga ona iloa e Sina e laitiiti le matou aulotu, ma ausage, ae mana'o lava ia tutusa le ola tautua o Apia-uta ma aulotu tetele o le Pulega.

E auai Sina i soo se sosaiete a le Ekalesia. O Sina na tosoina au i le Sosaiete a Malua Tuai, e faapena foi le Mafutaga a Tagata o le LMS. E galue Sina ma le filosofia - Ave au mea e atia'e ai, ae aua e te vaavaai i sau mea e maua mai ai.

Sa avea foi Sina o se sui mai le EFKS i le Mafutaga a Ekalesia Soofaatasi. Na iai foi taimi na tofia ai Sina e fai ma sui o tina o le atunuu i fonotaga i atunuu i fafo, e pei o Saina i le tausaga e 1995, ma le malo o Guam i le 1991.

E masani ona valaauina Sina e fai ni ana tautalaga i ni faatasiga a tina o le atunuu, atoa foi ma fonotaga a tina o le Ekalesia, e oo foi i Kolisi Faafaifeau.

E ese le pele ia Sina o le Sosaiete a Teine Papauta. Na iai Sina i lona faavaeina, e oo mai lava le valaau a le Atua, o loo avea lava o ia ma sui. A su'e atu Sina ae le maua i lona fale, ona saili lea i Papauta i le maota o le TPT e mautinoa lava faaaau itulau e 16

Taumafa Maloloina ma le Tusi Paia

(Healthy Eating and the Bible)

tatou tino e ala i taumafa e faaaogaina.

TOE UPU

Ua mautu atu se manatu i meaai o le tino nei. Peitai o upu a toeaiina, "o tama a manu e fafaga i fuga o laua ma i'a o le sami, ae o tama a tagata e fafaga i upu ma tala." O le vaega tele lea o le soifua maloloina, e le na o le tino puta ma momosi, ae o le tagata e iloa ona ola. E le aoga foi le soona ma'ona ae faata'eta'ealuga le ola faatuatua. O se feau lea e o faatasi ma le apoapoa'iga

a Mose i le nuu o le Atua i le ta'otolu o meaai o le tino (manai) na fafagaina ai le nuu i le vao, ae taotaotua mai ai ma le a'oa'oga, **"e le na o meaai e ola ai le tagata, ae o mea uma e tulei mai i le fofoga o le Alii e ola ai le tagata** (Teuteronomie 8:3) O le matafaioi lea a le Ekalesia, o le fafagaina o ona tagata i meaai tatau ma maloloina ina ia manuia ona tagata. Ua le masino le mau faafitauli i nei ona po. Ma o se lu'i lea mo i tatou. E le gata ia mamafi le manatu i le

maloloina o le tino, ae ia sili ona popona le Ekalesia i le soifua faaleagaga o tagata. Aua fo'i, o nei mau faafitauli ua tula'i mai, ua le mafua ona o le gaogao o le manava, pe o le ma'i o le tino, ae ua mafua ona ua gasegase le mafaufau ma le agaga. Ae le mafai ona aveesea ai le moomia o le atoatoa o le malosilava o le tino ma le agaga mo le galuega a le Atua. Fai mai la tatou pese masani, ave le tino atoa, ave le loto avea ma le agaga e auauna ai i le Atua. Ai lava o le malo lea o le Atua.

O E UA MALILIU



Gogosina Faaiuga Aiono Tuuau Sao 8 Oketopa 1924-17 Oketopa 2015 (Tina Penisione)

o loo iai iina.

O le aveva o Sina ma sui o nei faalapotopotoga uma, o sosaiete ma mafutaga, o le molimau ola lea o lona faatuatuaina, ma lona faamoemoeina, ma e saili i lana tofa tatala ma lana faautautaga faale-Atua, e ta'iala ma faatonutonu folau ai se folauga.

Na foaiina ia Sina ma Tuuau se fanau e to'a sefulu ma le tasi. O fanau a le la fanau e 46, o fanau o fanau a le la fanau e 44. O lona uiga e tolu tupulaga a Sina, ae selau ma le tasi le aofai o i latou na soifua mai ia Sina ma Tuuau.

O le matafale a Sina ma Misimasefili ma le fanau, o se tasi lea o aiga e fiafia e fai mea sili i mea e ta'ua ai le suafa o le Alii. E

tausi faifeau toe alofa i le faifeau ma lona aiga. E faapolopolo lava e Sina sa na tupe na maua atu i se isi, e faatali a'i la'u asiasiga. E le mafai ona ou alu ese ma le fale o lenei tina, ae le'i faia sa'u mea'ai. E masani i le talimalo. Ou te le o manatua pe na iai se Aso Sa na galo ai ia Sina ma le aiga se matou umu. A maua se palolo a lenei aiga, e faapolopolo lava mo le latou aso i Malua. E soifua lenei tina ma lona talitonuga i le moni o le upu a le atunuu "E le tautala se manava."

O le foa'i a le Atua ia Sina e ala mai i lana fanau, ma a latou fanau, ua matua tele na'ua. Ua tula'i mai ai toa o le Tala Lelei, o foma'i, o loia, o su'etusi, inisinia, o faia'oga ma pulea'oga, ua oo lava i upu fai o le Malo Tutoatasi o Samoa, i tofi faipule ma tulaga minisita o le Palemene.

O ona toe sauniga na faia i le EFKS i Apia-uta, i le itula e 10 o le aso 24 Oketopa 2015. Sa auai le Pulega a Apia Sasae i ona toe sauniga. Na ta'it'ai lava le tama o le Pulega, na faaulufale le tino maliu e Tuana'i Uesile FS, faitauina o le Tusi Paia o Fuifui Teevale FS, o talosaga na saunia e Elisaia Kolia FS, a o lauga na saunia e Moli Moli FS ma Kerisiano Soti FT.

O molimau: sui o le aiga - Tuloa Fetufou Namulauulu Aiono, sui o le fanau - faletua o Taualogomai

Paul Gray, Namulauulu Nuualofa Potoi, sui a le TPT - o le tina Penisione o Sapini E. Pasia.

Na faaiu i le molimau a le Faifeau Toeaina o Siolo Tauati. Na mae'a le sauniga i le falesa ona faaiu atu lea i lona oliolisaga tumau i lona maota. Sa ou taitaia le sauniga ma lagiina le pese e 268 e faatofa atu ai i lenei Tina Penisione.

Tatou toe faalogo tasi i le tauloto a Sina: "Se a se mea ou te tau'i ai i le Alii ona o lona agalelei mai uma lava ia te au? Ou te ava'e le ipu o le olataga ma ou valaau atu i le Suafa o le Alii. - Salamo 116:12,13.

Ia tofa la'ia, ia manuia lau malaga. Faafetai, malo galue.

Rev. Siolo Saufatu Tauati FT
EFKS Apia-uta.

'Aua e te Lima'imaa

**Fai mai le alaga'upu
faa-Peretania: A 'e
nofo i se faletioata,
'aua e te lima'imaa.**

**Ma le isi upu: O le
soona tafuli fua o
maa e tele ai loata.**

**Ae fai mai le
fetalaiga a le Alii
Faaola: O se e leai sa
na agasala, ia mua'i
togi sa na maa!**

Indifference

The opposite of love is not hate; it is something much worse than that; hate with all its negation and emotion at least takes the other into account; the opposite of love is something much colder, more pallid, and really much more cruel; the opposite of love is *indifference*.

And it is real, deep-down indifference that is at the heart of most family troubles.

(William Hague)

Church Collection

"When I look at this congregation," said the preacher, "I ask myself, 'Where are the poor? And then, when I look at the collection, I say to myself, 'Where are the rich?'"